









大清聖祖合天弘運文武睿哲恭儉寬裕孝敬  
誠信中和功德大成仁皇帝聖訓卷之四十二  
康熙十七年戊午二月庚戌  
上諭戶部積貯係國家大計年來各路兵馬需  
用糧餉浩繁在外總督巡撫及經管錢糧各  
官俱宜潔已奉公殫心稽察一應支放開銷  
務嚴加覈實節省方於軍國有裨近見各路  
奏銷或製備物料並不先行題明藉口軍機



緊急濫請銷算或不行察核重複支給又不  
爲扣抵或朦混重領希圖利己致滋糜費以  
及侵欺浮冒種種弊端難以枚舉以後應作  
何禁飭爾部會同兵部工部詳議具奏

康熙十八年己未六月辛未

上諭戶部民生以食爲天必蓋藏素裕而後水  
旱無虞自古耕九餘三藏富於民經久不匱  
洵國家之要務也比以連年豐稔粒米充盈  
小民不知儲積恣其狼戾故去年山東河南



一逢歲歉卽以饑饉流移見告雖議蠲議賑  
加意撫綏而被災之民生計難遂良由地方  
有司各官平日不以民食爲重未行申明勸  
諭故也近據四方奏報雨澤霑足可望有年  
恐豐熟之後百姓仍前不加撙節妄行耗費  
著各該地方大吏督率有司曉諭小民務令  
力田節用多積米粟俾俯仰有資凶荒可備  
以副朕愛養斯民至意

康熙二十年辛酉三月庚午



上諭戶部倉場侍郎等曰近聞各倉發米多雜  
土塵有賄者給好米經管之人種種作弊上  
下串通侵欺盜取者甚多此米係人生命朕  
一經體察務將始末澄清爾等應知此等情  
弊若不加嚴察永行杜絕是知而自取罪戾  
矣

康熙二十一年壬戌七月甲寅

上諭戶部各省常平等倉積貯米穀甚屬要務  
有此積貯偶遇年穀不豐彼地人民卽大有



裨益雖先經奉旨通行恐有名鮮實一遇水旱議賑之時未能接濟致民生艱困今將某省實心奉行某省奉行不力其逐一詳察以聞

康熙二十五年丙寅六月丙辰

上諭大學士等曰朕自卽位以來二十餘年凡民間之事留心體訪深知情狀古人不言救荒而言備荒故三年有一年之積九年有三  
年之積雖閒值水旱小民不致失所去歲可



謂豐年設今歲不登卽致饑饉總由素無積貯耳卽常平一倉積米太多亦易朽爛若臨時令有司捐貸則又不可縱有良法奉行不得其人終屬無益苟得良有司視民如一家休戚相關始克有濟耳

十二月丙辰

上諭大學士等曰聞有運盛京糧米於山海關內者又有泛海販糶於山東者糧米所繫最爲緊要況今議遣防戍官軍人口衆多糧糈



未必足用宜下所司密咨移盛京將軍副都  
統戶部侍郎令以己意禁止之

康熙二十八年己巳十月辛卯

上諭戶部倉廩積貯專備本地災歉若因應賑  
州縣無糧以他處倉米易銀移賑則有糧州  
縣反無備災之糧倘遇凶荒其何以應且一  
時出糶其價必賤於賑濟亦無大益其積貯  
不足之所可動支正供錢糧速行賑濟

康熙二十九年庚午正月癸卯



上諭戶部朕撫御區宇夙夜孜孜惟期厚民之  
生使漸登殷阜重念食以養民必蓋藏素裕  
而後水旱無虞曾經特頒諭旨著各地方大  
吏督率有司曉諭小民務令多積米糧俾俯  
仰有資凶荒可備已經通行其各省徧設常  
平及義倉社倉勸諭捐輸米穀亦有旨允行  
後復有旨常平等倉積穀關係最爲要緊見  
今某省實心奉行某省奉行不力著再行各  
該督撫確察具奏朕於積貯一事申飭不啻



再三藉令所在官司能俱體朕心實有貯積  
何至如直隸地方偶罹旱災輒爲補苴之術  
嗣後直隸各省總督巡撫及司道府州縣官  
員務宜各遵屢次諭旨切實舉行俾家有餘  
糧倉庾充牣以副朕愛養生民至意如有仍  
前玩愒苟圖塞責漫無積貯者將該管官員  
及總督巡撫一并從重治罪爾部卽遵諭通  
行

七月癸巳



上諭戶部朕撫育黎元勤思治理足民之道宜裕蓋藏從來水旱靡常必豐年恒有積貯庶歉歲不憂饑饉如康熙二十七年頗稱歲稔誠使民間經營撙節早爲儲待何至康熙二十八年偶遇旱災室皆懸罄總因先時無備遂至餬口維艱比蠲除正賦特發帑金分行賑濟所在官司悉仰體朕懷竭力從事被災之衆始獲安全倘非拯救多方則熒黎必流移失所今霖雨時降黍苗被野刈穫在卽可



望有秋惟恐愚民不知愛惜物力狼籍耗費  
祇爲目前之計罔圖來歲之需縱今年獲屢  
豐亦難漸臻殷阜應行直隸各省督撫嚴飭  
地方官吏家諭戶曉務俾及時積貯庶終歲  
所食常有餘儲用副朕軫念民依綢繆區畫  
至意爾部卽遵諭行

康熙三十一年壬申正月壬子

上諭大學士等曰去歲陝西西安等處年穀不  
收罔有積貯以致閭閻困苦已遣使賑濟之



矣今年豐歉尙未可知陝西省府州縣見存  
米穀之數應行察明先時豫備至各省府州  
縣皆令積貯米穀數千石則裨益黎庶者大  
矣可下各該督撫等令各府州縣積貯米穀  
其所積穀數逐一繕冊報部

五月辛亥

上諭大學士等曰朕思積貯米穀最爲要務倘  
能實有蓋藏則雖遇荒歉必不至於饑餓但  
小民不知儲備每遇豐稔之年恣意糜費一



遇歉歲卽坐困不支今值麥田收穫之時應行各該地方官勸諭百姓令各戶量力捐輸積貯該州縣官以輸納之人姓名數目詳記冊籍當秋禾收穫以後亦依此例舉行至春月轉貸於匱乏之民俟秋月卽照此數償還備用每歲如此遵行不數年間米穀充裕縱使歲遇不登何至閭閻艱於粒食乎

康熙三十三年甲戌七月辛卯

上諭大學士等曰密雲縣田禾失收今年雨水



甚大著速行文倉場侍郎將通州倉所貯粟米以一萬石運至密雲縣五千石運至順義縣乘水方盛速行運到令其收貯

康熙三十四年乙亥八月癸巳

上駐蹕密雲縣

諭大學士等曰去歲朕見此處高粱結實者少  
糝者多米價騰貴高粱一斗幾三百錢故將  
通倉米令運一萬石至此處五千石至順義  
縣減時價發糶米價稍平一斗百錢民以不



困北地寒冷米穀多至失收今河水方盛著  
將通倉米運至密雲順義各一萬石令貯倉  
備用

康熙三十五年丙子十二月辛亥

上諭大學士等曰黑龍江吉林烏喇地方頻歲  
不登可移文盛京將軍令整繕船隻將盛京  
倉儲米穀以彼地人力運五千石至莫爾渾  
阿敦之地積貯之又

諭曰今歲自天津海運至盛京之米已給散科



爾沁貧乏之衆來歲仍當自天津運米至盛  
京其轉運船隻不必用福建浙江二省船止  
用天津船輓輸一次可傳諭侍郎陶岱

康熙三十六年丁丑三月壬戌

上諭大學士伊桑阿曰州縣俱有積貯米穀兵  
丁所駐沿邊衛堡亦甚緊要其榆林等處衛  
堡俱照州縣積貯之例將米穀積貯豫備著  
交該巡撫遵行

七月丙午戶部議覆陝西巡撫巴錫疏



言各衛堡積貯米穀宜分撥沿邊各堡  
運貯應如所請

上曰此各衛堡米穀若責令承收官員自備轉  
運之費路遠而險勢必科派小民巡撫之奏  
戶部之議皆非也其俟秋成後令該撫酌支  
正供買米收貯

康熙三十七年戊寅二月庚午

上諭大學士等曰戶部將曾經保舉司官二員  
差往被水災沿河之保定霸州固安文安大



城永清開州新安等州縣截留山東河南漕糧每處運致一萬石以備積貯俟米價騰貴時平價糶賣

康熙三十八年己卯十月癸酉

上諭大學士等曰黑龍江地方連歲歉收著將烏喇收貯米糧運至默爾根齊齊哈兒地方豫備若彼處有引水種田之處著能耕種之人前去教導交該部議行

康熙三十九年庚辰三月乙未



上諭戶部淮揚等處百姓罹於水災未寧幹止  
朕心時切軫念比歲以來多方優恤蠲免賑  
給靡不舉行去年春朕親履河工目擊小民  
田廬皆被淹沒災黎艱於粒食益惻憫於懷  
爰命地方按戶賑濟又將截留漕糧發賑平  
糶俾得贍養上下兩河堤岸前屢發帑金修  
築去年二月面諭河工諸臣速行修治至今  
尙無成效復遴選廷臣同往經理無非軫念  
民瘼欲令黃運兩河堤岸速成斯民早安生



業耳念水患一日不除則百姓一日不得耕  
種因是深以爲慮著將今年漕糧截留二十  
萬石存貯淮揚地方備用爾部卽遵諭行

七月丙辰

上諭戶部國家要務莫如貴粟重農朕宵旰圖  
治念切民生惟期年穀順成積貯饒裕於以  
休養黎元咸登樂利今聞直隸各省雨澤以  
時秋成大熟當此豐收之時正宜以饑饉爲  
念誠恐歲稔穀賤小民罔知愛惜粒米狼戾



以致家無儲積一遇歲歉遂致仳離著該督撫嚴飭地方有司勸諭民間撙節煩費加意積貯務使蓋藏有餘閭閻充裕以副朕重農敦本愛養元元至意

康熙四十一年壬午三月辛卯

上諭戶部朕躬理幾務年久深知稼穡之事念阜民之道期於有備去冬北地少雪今春雨澤微降尙未霑足誠恐蝗蝻易生有傷農事所在官吏亟宜先時豫防直隸山東山西河



南陝西江北地方歷年積貯倉糧果否足額該督撫宜確加稽核務使廩有餘儲不致匱乏其一切豫備事宜須悉心講求料理縱年歲不甚豐稔亦可賑濟無虞至直隸各省見今雨澤有無多寡著該督撫卽行具摺奏聞以紓朕宵旰勤民之意

康熙四十二年癸未十二月辛卯

上諭大學士等曰朕頃巡幸陝西閱視汾渭俱屬大河直與黃河相通河南等處米穀似可



由黃河轉運但聞三門砥柱水勢極溜船不能上朕欲親往閱視因陝州知州奏無路徑斷難行走遂未果行特命三貝勒允祉同近御侍衛往視據回奏言伊等遣人乘騎涉河一道閱有神人鬼三門俱係鑿石開通水從三門流出其勢甚寬其流甚急古人於山上鑿有曳船眼孔但未經以船試驗不知可否行走前總河靳輔亦曾奏黃河通於汴河但淤墊年久若行疏導即可運糧朕至河南閱



河南府居各省之中水路四達最爲緊要之地應於此處儲積米穀每年田畝豈能必皆豐收倘山陝等省閒或收成歉薄卽可將此積貯米穀修造船隻由黃河挽運若到三門砥柱船不能上亦可於三門砥柱造船剝運以至山陝誠使河路疏通則商賈人民大有裨益所宜於無事之時豫爲籌畫者也豫省每年解京漕糧二十萬石有奇若將豫省三年漕糧截留備用則陝西等省雖值歉收之



年將此米穀運至彼處賑濟殊屬有益俟明  
歲遣大臣往視

康熙五十二年癸巳五月辛巳

上諭大學士等曰今年八九月內應撥江南省  
積貯倉米十萬石用京口將軍標下戰船及  
松江提標戰船狼山鎮標戰船裝載著總兵  
官穆廷枻總管船隻浙江省積貯倉米內亦  
撥十萬石用浙江提標戰船及定海鎮標戰  
船裝載著總兵官吳陞總管船隻俱運至廣



東此運米兵丁往返時或遇風勢不順行船有阻亦未可定所需口糧皆宜豫備但不得動用賑濟額米江南織造署內朕曾令貯米一萬石如八九月間江南無動用此項米石之處卽將此米石亦令一并運去著行文該督撫知之

康熙五十三年甲午七月辛亥

上諭大學士九卿等曰朕聽政年久深悉民生利弊凡國家要務無時不豫爲籌畫有奏摺



人來朕皆細問咸稱江南天旱江浙米價亦不甚賤今春山東河南田麥歉收交冬米必騰貴若待彼時方爲料理恐不能及朕詳悉思維將漕糧撥三十萬石江寧府十萬石蘇州府八萬石淮安府揚州府共五萬石杭州府五萬石開封府二萬石著漕運總督親身閱兌速行運至令其加謹照數收貯有此米石軍民心安而米價自不驟貴至豫省漕糧該部亦應豫行詳議今若雨澤及時田禾豐



收則此項米石由水路撥給他處亦可著議  
奏

十一月乙卯

上諭戶部朕臨御多年無時不軫念民瘼每歲  
於直隸各省凡雨暘期候豐歉情形莫不留  
心訪察雖在僻遠必務周知偶值一二處災  
傷蠲免賑救不惜重費倉帑以蘇我民困也  
朕思賑濟災歉以速爲貴必待督撫奏報往  
返候命使小民嗷嗷待哺何如豫備積貯於



平時則所在有可恃之資而臨事免轉移之  
勞今漕輓通行倉庾充裕江浙地方年來頗  
有歉收州縣應酌量截留漕米分貯各處江  
寧原留五萬石今再截留十萬石蘇州原留  
八萬石今再截留二萬石安慶截留十萬石  
杭州原留十萬石今再截留十萬石皆於本  
年起兌內就近截留令地方官加謹收貯至  
應動用之時著該督撫題請爾部卽遵諭行

康熙五十五年丙申五月壬申



上諭大學士等曰閱今歲督撫等奏摺陝西山  
西河南山東等省二麥豐收乃京師麥價未  
見甚減京師所賴者山東河南之麥此兩處  
俱通水路不知一年販來幾何或沿途富商  
大賈豫行收買以致京師麥價不減亦未可  
定從前江南浙江所買湖廣江西米數及湖  
廣江西賣去米數該督撫俱具摺奏聞大有  
裨益今山東河南除陸路販賣者無庸稽察  
外自水路買來麥穀數目可否照湖廣江西



督撫具摺奏聞之處爾等會同九卿確議具  
奏  
十月丁亥朔  
上諭大學士等曰張伯行條奏宜立社倉前李  
光地爲直隸巡撫時亦曾請立社倉朕諭此  
事言之甚易行之甚難爾姑試行後試行之  
果無成效倉糧庫帑設官專理尙且虧空社  
倉所收穀石交百姓收貯寺廟虧空又何待  
言耶其果否可行之處爾等會同九卿詳議



具奏

康熙五十六年丁酉四月乙未

上諭大學士九卿倉場侍郎等曰邇年以來通倉積米甚多著分運直隸各府州縣存貯豫備於民甚有裨益每府或貯萬石每州縣或貯數千石附近通州河道者交與倉場總督等運送其餘府州縣所運米石速行文直隸總督派地方官乘未雨之先輓運值此青黃不接之時於各府州縣平糶亦大有益於百



姓其江南浙江如有應行截留漕糧若干之處爾等一并速議具奏

丁酉

上諭大學士九卿等曰近來米價必不能如往年之賤昔大學士張英曾奏桐城縣米價銀一兩可得三石見今四川米價亦復如此雲南廣西貴州米價亦不甚貴大抵戶口稀少則米價自賤今太平日久生齒蕃息安能比數年前之米價乎戶口殷繁固是美事然當



豫籌安養之策今將米石運送各處或平糶或賑濟不過僅可餬口未必卽能充裕張伯行曾奏於永平府設立社倉永平知府近日行之甚苦社倉之法旣屬難行通倉米石有餘不如運送各州縣爲便又

諭曰見今通倉米石甚多應運送之州縣卽當運送去年皇莊米石俱交州縣積貯但倉中未必實有其數畿南廣平大名等府有水路可通應交直隸總督作何運送至密雲古北



口去年曾運通倉米每處各一萬石亦甚易  
或仍交倉場總督運送爾等速議具奏

康熙五十八年己亥正月壬寅

上諭大學士九卿等曰京城通州倉內貯米甚  
多各省運至漕糧亦無虧欠在倉堆積恐致  
紅朽杭州蘇州鎮江江寧淮安安慶等處俱  
有倉廩與水路相近江南浙江漕船想此時  
已過淮朕意欲將湖廣江西等未過淮漕糧  
截留存貯此等地方倉內遇米價騰貴之年



將此存貯米石或減價糶賣或行散賑則民人得沾實惠大有裨益如蠲免地丁錢糧不過於田多富戶有益其無地窮民未必均沾實惠米穀甚屬緊要不可不豫爲備也年來豐收米價雖賤但歲歲大有豈能期必乎應將久遠裨益之處豫行籌畫爾等將漕糧作何截留之處會同議奏

康熙六十一年壬寅四月戊午

上諭戶部趙弘燮奏將收貯真定順德各州縣



四萬石米平糶其餘各州縣有米貴之處亦將倉米平糶十分之三俱俟秋收後買補還項等語去年各州縣收貯莊頭等所交米石部內曾遣司官會同地方官糶賣其糶米銀兩至今尙未完繳據此各州縣收貯倉米俱無實際平日積貯原爲備荒而設今值青黃不接之時固應平糶但地方官虧空倉米不過糶賣數石卽借此掩飾虧空究竟倉米旣虧百姓何從糶買於民生並無裨益也見在



存倉米穀如果足數卽照該督所請糶賣倘  
朕遣大臣查看時州縣並無米穀黎庶不得  
糶買將州縣官卽行正法該管上司從重治  
罪

六月壬戌

上諭大學士等曰暹羅國人言其地米甚饒裕  
價值亦賤二三錢銀卽可買稻米一石朕諭  
以爾等米旣甚多可將米三十萬石分運至  
福建廣東寧波等處販賣彼若果能運至於



地方甚有裨益此三十萬石係官運不必收稅

十月辛酉

上諭議政大臣等曰倉糧關係甚要支放米時理應一厥放畢再放一厥今聞此厥米石支領方半又向別厥支領所剩米少而所占之厥甚多又支領白米時諸王公主等屬下之人不按應放之厥領米而揀厥霸占支領者有之此等斷然不可理應按厥支領如厥內



餘米一半者卽是弊端應將此徹底清查若遣他人亦未能辦著和碩雍親王帶領弘昇延信孫渣齊隆科多查弼納吳爾泰前往會同張大有查勘再從前倉內每日進廩之米止四五千石自簡任富寧安以來每日進廩之米至四萬石進米多則於回空糧船有益至於米色之變俱在收貯之善與否卽如昭五達地方所貯米石歷四十年米色照常竝未霉爛今廩座有損漏者著卽修理廩座如



不敷用著卽添造

大清聖祖合天弘運文武睿哲恭儉寬裕孝敬  
誠信中和功德大成仁皇帝聖訓卷之四十二







大清聖祖合天弘運文武睿哲恭儉寬裕孝敬  
誠信中和功德大成仁皇帝聖訓卷之四十三  
飭臣工一

康熙七年戊申二月丁酉

上諭吏部等衙門前諭督撫奏事必舉其事之  
原委明晰入告部院將應結之事亦卽行完  
結勿得遷延駁察近見督撫奏疏仍有事情  
未晰者部院亦有將應結之事遷延駁察者  
如此草率不加詳慎殊負委任之意今後督



撫奏事若不詳明具奏著嚴行叅處各部院  
若將應結之事復搜求細故借端駁查定行  
治罪

康熙八年己酉六月丁卯

上諭戶部凡奉差及直隸各省地方見任各官  
俱有董理公務竝撫綏百姓之責宜各盡乃  
職以副朕差遣簡用之意近聞奉差官員及  
督撫提鎮大小文武各官不思盡職惟圖利  
己及買良民爲奴甚至多買餽送親友此等



違法妄行殊屬可惡以後著通行嚴禁若仍  
前恣買良民者從重治罪決不姑恕

康熙九年庚戌三月己卯

上諭吏部等衙門時已入夏雨澤愆期皆由部  
院大小臣工因循舊習不能精白乃心公廉  
盡職以致政務失當有干

天和爾等堂官宜力圖修省靖共職業嚴督所  
屬司官凡事秉公勤勵革除積弊毋得瞻徇  
情面仍稽察胥吏作奸事有宜結者速爲完



結勿借端屢駁冀遂已私至於法司一切訟  
獄務期平允得情速審速結勿株連無辜久  
致淹繫爾等大小官員當實心修省毋視爲  
具文怠玩如故有負朕委任責成之意

九月乙亥

上諭吏部兵部朕惟致治雍熙在於大小臣工  
悉尙廉潔使民生得遂內外滿漢文武官員  
各有職守必律已潔清屏絕餽遺乃能恪共  
職業副朕任使近聞在外交文武官尙有因循



陋習借名令節生辰剝削兵民餽送督撫提  
鎮司道等官督撫提鎮等官復苛索屬員餽  
送在京部院大臣科道等官在京官員亦交  
相餽遺前屢經嚴禁未見悛改殊違潔己奉  
公之義兵民日漸困乏職此之由以後著痛  
加省改斷絕餽遺以盡厥職如仍蹈前轍事  
發之日授受之人一併從重治罪

康熙十二年癸丑五月庚辰

上諭吏部國家大小事務在內責成部院在外



責成督撫其事情重大繁難者仍照限完結如平常易結之事理應速結以清壅滯近見內外各衙門題覆本章有將易結之事遲延不結必俟限滿具題其不行具題完結者必多牽連守候以致苦累自後著速行完結毋得遲延務俾案牘一清副朕委任至意

八月庚子

上諭都察院左都御史多諾等曰爾衙門職係言官凡事宜各抒己見豈可以公同具奏充



數已乎爾衙門所奏之事雖皆曾經列名但副都御史岳諾惠等畏懦瞻顧竟無建白嗣後應公奏者公奏若事應獨奏其各出已見以聞

九月甲申

上諭吏部等衙門國家致治首在崇尙寬大愛惜人才俾事例簡明易於遵守處分允當不致煩苛乃符明作惇大之治向來各部院衙門俱定有處分條例已經頒行但其中款項



太多過於繁密以致奉行者或以膠執爲守法或以苛索爲詳明或例所未載援引比附輕重失宜徒據成規罔原情理大小各官稍有過誤動觸文網雖具才能弗克展布深爲可惜著部院各衙門將見行處分條例重加訂正斟酌情法刪繁從簡應去應留逐一分別詳議具奏

十二月辛丑

上諭吏部兵部國家人用人宜先沉靜之才人臣



服官首重廉恥之節邇來文武官員或因不得陞遷或因不得差遣輒稱冤抑紛紛控告不過圖便己私原非從公起見縱屬應陞應差而自爲辨白希求榮利廉恥之道已虧豈能修舉職業克副任使理宜嚴禁以肅官常爾二部可通行申飭

康熙十三年甲寅正月庚辰

上諭朝覲藩臬等官曰爾等朝覲官員各有職掌俱宜實心任事潔己愛民安輯地方消弭



盜賊錢糧不得加派刑名務期明允賑濟蠲免必使民沾實惠以副朕察吏安民至意如不遵行國法具在

三月辛巳

上諭安南將軍華善曰京口地當要害特遣爾率兵往鎮倘附近有警亦宜應援軍行往來與駐防之地務嚴禁軍士勿令擾民間前者兵行率多擾害爾等當以爲戒否則罪有所歸



康熙十六年丁巳三月己丑

上諭鑲白旗副都統吳直及兵部尙書塞思赫  
顯親王下長史馬七辦理府務佐領達席賢  
溫郡王下長史鄂樂辦理府務一等護衛郭  
布博濟等曰邇年以來鑲白旗盜賊光棍匪  
人甚多凡此妄行之人皆因該管官不豫行  
曉諭嚴禁聽其陷於法網無知愚人自投死  
地且某旗好尙何事則一旗之人皆尤而效  
之某族中好尙何事則一族之人皆尤而效



之種種陋習罔不漸染爾等係此旗官員各有管轄教訓之職嗣後須曉諭嚴切務令盜賊光棍永行禁止至於所屬之人因伊主幼小遂爾藐視恣行匪僻此皆爾大臣衆官不行嚴禁之故嗣後爾等宜各敬其主竭力料理公事至於用人勿得較論分屬之人惟當選擇賢能任事

七月甲辰

上諭大學士等曰人臣服官惟當靖共匪懈一



意奉公如或分立門戶私植黨與始而蠹國  
害政終必禍及身家歷觀前代莫不皆然在  
結納植黨者形跡詭秘人亦難於指摘然背  
公營私人必知之凡論人議事閒必以異同  
爲是非愛憎爲毀譽公論難容國法莫追百  
爾臣工理宜痛戒若夫汲引善類不矜己長  
同寅協恭共襄國事是又不可以朋黨論也

八月丁卯

上諭吏部等衙門向來各衙門事件關係重大



者雖有定限赴科道稽察但事易結者卽宜速結必俟限滿方行題覆多致壅滯更有各項呈狀不係註銷者任意耽延借端拘提人犯數月不爲審結無辜牽累殊堪憫惻自後題覆本章俱速爲料理不必盡拘定限至於審理事件亦速爲完結照註銷欽件例定限每月造冊赴都察院科道稽察具奏爾等各宜力圖振作體恤民隱以副朕孜孜求治之意



康熙十七年戊午正月戊戌

上諭議政王大臣等曰逆賊吳三桂等背恩倡  
叛荼毒生靈擾亂疆宇朕念切除凶志安民  
社仁育義正恩威竝行大將軍等旣承簡任  
當勵忠貞之誼早奏戡定之勲以副朕愛民  
至意乃自用兵以來大將軍王貝勒將軍大  
臣等固有盡心王事已著勞績者亦有觀望  
逗遛不思振旅邁進竟爾營私適己希圖便  
安或諉甲兵之不全或托舟楫之未具借端



引日坐失事機者甚而干預公事挾制有司  
貪冒貨賄占踞利藪更有多方漁色購女鄰  
疆顧戀私家信使絡繹尤可異者新定地方  
亟需安輯乃於所在攘奪焚掠種種妄行殊  
乖法紀本宜嚴察職名從重治罪但時當進  
剿姑免處分策勵後效各路大將軍王貝勒  
將軍大臣等各宜乘時進取恢復封疆拯救  
民命一切違法之事嚴加禁止倘有不遵許  
督撫指叅繩以重典兵丁廝役犯者其將領



家主均行連坐官員犯者除本官重治外將  
帥分別議處地方官逢迎餽獻一并嚴懲如  
督撫不糾或經言官劾奏或爲被害首陳該  
督撫以徇庇論督撫提鎮等官自違禁條加  
倍究治其以此傳示內外嚴加曉諭俾一體  
遵行

三月壬午

上諭吏部戶部兵部朕統御寰區孜孜圖治期  
於朝野安恬民生樂業共享昇平乃副朕宵



旰飭精之意不意逆賊吳三桂背恩煽亂各處用兵禁旅征勦供應浩繁念及百姓困苦不忍加派科斂因允諸臣節次條奏如裁減驛站官俸工食及存留各項錢糧改折漕白二糧顏料各物增添鹽課鹽丁房田稅契牙行雜稅官戶田地錢糧奏銷浮冒隱漏地畝嚴行定例處分用過軍需未經報部不准銷算以上新定各例不無過嚴但爲籌畫軍需早滅逆賊以安百姓之故事平之日自有裁



酌各省督撫提鎮大小文武等官俱宜上體  
朕意下念民生潔己奉公愛惜物力務期早  
奏蕩平與民休息以稱朕乂安海宇至意

四月壬辰

上諭吏部等衙門國家設法定例原期章程盡  
善垂之久遠上裨軍國下益民生必藉內外  
臣工精白乃心恪共詳慎實心奉行方克永  
遵而無弊近見各處章奏凡於見行之例或  
借端營私巧爲掩飾或推諉卸過冀免處分



或徇庇情面曲爲彌縫凡行一事每滋弊端以致良法美意澤未下究而累已及民揆諸立法初意殊爲未符此等情弊科道官雖有風聞因無確據難於指叅朕雖洞悉緣由期其自行改悔不加深求遂爾因循以爲僥倖之路以後在內部院等衙門在外督撫各官滌慮洗心痛改積習於有益國家民生事務籌畫擔當不避嫌怨務期法行無弊恩被閭閻以副朕立法定制愛養斯民至意如視爲



故事仍蹈前轍事經發覺定行嚴加處分著通行申飭遵行

七月戊午

上諭兵部直隸各省綠旗兵丁經制額數專爲防守汛地征勦賊寇而設該管各官自宜實足兵數以資戰守督撫提鎮等經制兵內如有充伴當書記軍牢以及馬夫水夫等役悉行裁汰務足兵額倘仍不改陋習因循踵行該督等糾劾從重治罪若督撫徇庇不糾或



爲科道指叅或被旁人首發治以徇庇之罪  
決不輕貸其通行曉諭

康熙十八年己未八月甲戌

上諭吏部等衙門凡爲臣子者同寅協恭自古  
皆然今各部院辦理事務大小漢官凡事推  
諉滿官事之得當則歸功於己如事失宜則  
卸過於人至於入署不待事畢諉於滿官祇  
圖早歸宴會嬉遊不爲國家盡力擔當料理  
公務此後各宜協力同心務盡厥職不可仍



前推諉至科道各官平日章奏內將一二可  
行之事隱附私情希圖作弊凡有條議鮮非  
無因閱覽奏疏多以己爲至公至廉其囑託  
公事肆行妄爲外播威勢挾制多端地方督  
撫等官莫不畏懼小民困苦未必不由於此  
作何懲戒著九卿詹事科道詳議具奏

辛卯

上諭大學士等曰滿漢論事往往不能和衷漢  
官每謂滿官偏執若漢官肯實心爲公據理



辨論滿官豈有不從之理若滿官堅意偏執  
漢官卽當奏聞從來有治人無治法爲政全  
在得人人臣事君全在辨心術之公私今爾  
諸臣之才皆能料理政務但徇私利己者多  
公忠爲國者少若諸臣肯洗心滌慮公爾忘  
私國爾忘家和衷協恭實盡職業庶務何患  
不就理國家何患不治平哉爾諸臣其勉之

九月庚子

上諭議政王大臣等曰孫思克奏稱賊多步行



踰嶺登山如履平地小路曲徑賊所稔知我  
兵前進恐賊由曲徑潛躡我後以絕餉道爲  
害滋甚朕思秦地綠旗之兵爲數甚多其中  
步兵不少且各省綠旗兵向推秦兵精銳賊  
能跋涉山嶺我兵豢養有年何獨不能况漢  
中興安爲秦內地滿漢大兵經行熟悉何得  
視同絕域輒荒誕其辭凡將帥用兵前進衝  
鋒後顧餉道務詳度以合機宜乃一定之道  
也倘以賊閒道潛來斷絕餉道爲憂怯懦不



前則永無破賊之日矣又疏言大將軍公圖海分滿漢兵爲四路雖分賊勢終憂兵單綠旗兵每人止有一馬且未必皆強壯可用之兵惟滿洲大兵堪任第爲數無多雖欲另調又恐秦地三邊番夷甚衆當此秋高馬肥思逞之候實無兵可調不若俟來春二三月間塞外草尙未生水泉猶涸之時多調邊兵以資戰守各路進發朕思秦中滿兵不少綠旗兵較各省更多今稱兵力單弱顯屬畏縮憚



於進兵且各省綠旗兵亦止一馬曾無多給  
而且越境征勦粵東粵西閩楚諸處今又進  
定滇黔較之平定境內漢興勞逸何如耶向  
者凡將軍提鎮官募兵時必選精壯勿使濫  
收充數定例嚴明今若以秦兵皆非強壯難  
以應用則孫思克職任何事觀此則欺蔽之  
情更顯然矣且有將軍公圖海在彼乃妄  
議大兵多寡殊屬狂妄又云番夷馬肥思逞  
欲俟來春二三月閒草尙未生泉水猶涸之



時進取設或二三月閒進取之後四五月閒  
番夷馬肥思逞將若之何正值秋成涼爽各  
處賊寇大敗震驚之餘不速行蕩平反欲於  
來春青黃不接之時進取是又何意耶又奏  
稱秦省大半皆山地瘠民貧不產秔稻所種  
惟麥豆之屬向有捐納之事稍裨用兵今例  
已停罷民受採買之苦且山路險阻必資負  
載駝運其僱賃之價數倍於應輸之賦今各  
路需餉甚多山徑狹隘輓運維艱時當初冬



草枯葉落畜牧無資欲俟來春調集官兵務期兵強餉足共圖進取者職此之故朕思粵東粵西諸省山嶺亦多何曾豫備糧餉官兵豈有止食稻米不食他粟之理至於捐納各省俱停止留粵西事例以資平滇軍需之用自定秦省數年以來未曾勞民轉運且漢興雖多險阻乃陝西內地非隔省百姓轉輸可比今恐輓運累民至春又誰爲轉運耶當逆賊敗遁之時急令進兵者正爲早定地方以



安百姓耳採買恐累於民巡撫杭愛題奏已  
經改定今以請開事例轉運維艱爲辭其規  
避進兵明甚又疏稱八旗官兵今年七月二  
十八日京師地震房屋傾壞壓斃人民聞之  
各懷內顧之憂臣所以暫停進取以回  
天意俟人心稍定再議進兵未晚朕思八旗官  
兵世受豢養朕之加意臣僚士卒尤爲渥厚  
不特房屋傾圯細故卽蹈湯赴火誼亦難辭  
孫思克封疆大臣凡事不加詳察妄言人情



皆動以惑軍心殊失大臣之體細察孫思克  
疏內前後情由惟耽安逸怯於進兵列款巧  
奏且自秦省有事孫思克等係封疆大臣俱  
應按律議處念同大兵進剿宥過計功給以  
世襲之官加以不次之擢當捐軀報國破賊  
安疆自請前進効力乃孫思克身任提督統  
轄全師不思奮力前進反煽惑滿漢動搖民  
心飾辭妄奏深負朕擢用之恩情罪殊屬可  
惡其令翰林學士喇沙里速往嚴取口供來



奏尋喇沙里取供還奏

上曰孫思克理應嚴察治罪但今方統兵與大兵分路進剿俟事平日再議

十月辛卯

上諭九卿詹事科道等曰邇來諸事爾等全不擔當或遇事有疑難卽以未經與聞不同啓奏或托言他事及病不赴會議在部辦事或推諉不肯列名或有過卸於司屬意圖僥倖若果應坐罪豈推卸便可脫免乎又有臨事



全無一語及旣退之後輒云我曾如此立論而某官不肯見從朝廷不曾俞允此豈臣子靖共之道乎至部院衙門司官亦多偷安廢弛各堂官宜將此等司官指名題叅九卿會議處有規避者著都察院及科道官糾叅嗣後爾等當直摠所見陳奏審酌可否自在於朕爾等勉之

康熙十九年庚申正月辛亥

上諭九卿等曰科道官內陞外轉原以示勸懲



也今見才優者猶知憚於外轉其或才力不  
及不稱言職之人安於外轉道員者甚多是  
但以示勸非所以示懲也故令九卿詹事科  
道會議務期得當乃會議時俱瞻徇情面不  
肯議以小品用此無他直是畏科道耳夫人  
臣事君苟立心正直行事公平何所顧慮於  
人其畏科道者皆由平日自處不正故也朕  
於諸臣素行無論在官在家一舉一動罔弗  
知之不卽發覺者欲令改過自新以全國家



待臣下之體奈何不畏朝廷而徒畏科道之  
指摘乎近日科道官專以虛聲肆其恐嚇竝  
未有真能叅大奸大貪者如此不職若不分  
別勸懲何以大破積習使知勉勵乎據魏象  
樞等奏恐天下不肖之輩不識朝廷慎重科  
道之意疑爲厭薄言路之端邇年以來姚文  
然李之芳施維翰等內陞未久卽任以大僚  
督撫亦因其克盡言職才能素著之故此無  
論天下智愚賢不肖當亦知朝廷無厭薄言



路之意矣其外轉者或係素無建白或係昧於事理或係任臆妄言或係才力不及原非因其條奏而外轉也外轉科道以小品官員用遂言有礙國體殊不可解朕心本虛公初不執定一說若果在必行何難旨意票出特命諸臣會議者正欲公同參酌務合乎中道耳爾等可傳諭各官示以朕意

二月壬午

上諭大學士等曰初逆賊反叛時克殫忠義或



從賊所設計來歸或大兵已至尙爲賊困此  
等人錄其善而獎其忠方爲允當亦有大兵  
已恢復地方奸猾之徒先附賊妄行因賊衆  
潰散焚毀僞劄逃避山林文飾耳目以圖僥  
倖者今給事中姚祖頊槩請獎敘被難人員  
甚爲失當可加嚴飭嗣後科道官條奏朕先  
行披覽仍面加詳問如此則人之才能及所  
奏之意咸可知矣

五月癸卯



上諭大學士等曰向以亢暘齋居虔禱雖雨澤  
薄降四野田疇尙未霑足今茲不雨爲時又  
久旱魃爲災朕甚懼焉意者政事之失宜者  
多歟不然

天心仁愛下民何其宜雨而久不雨也日者以  
政理之故勤求言矣而言者文繁無益其集  
九卿詹事科道掌印不掌印各官問有何事  
當行何事當革悉意以陳毋有所隱

是日



上諭大學士九卿詹事科道等曰朝廷致治惟在端本澄源臣子服官首宜奉公杜弊大臣爲小臣之表率京官爲外吏之觀型大法則小廉源清則流潔此從來不易之理如大臣果能精白乃心恪遵法紀勤修職業公爾忘私小臣自有所顧畏不敢妄行在外督撫各官自應慎守功令潔己愛民乃大臣等每自謂清正無私粉飾空言至其所行往往營私作弊有玷官方深負委任之意科道係耳目



之官凡有弊端自當據實叅奏且居處甚近  
如此情弊豈無見聞乃瞻徇情面緘默不言  
卽有條奏多係繁文言官職掌殊爲未盡如  
肯從公糾舉孰敢恣行無忌朕以爲目今之  
弊莫大於此近因天氣亢旱朕夙夜焦思念  
慮所及無不舉行感格之道猶恐未盡故特  
召爾等各面陳所見因宣諭朕意令爾等知  
之

六月戊辰



上諭黃巖總兵官林本植曰黃巖要鎮今海賊雖已敗遁恐其出沒不常又沿海之民或有奸宄勾連外寇爲害匪細尤宜加意嚴防林本植奏曰沿海之地必須精練水師臣西北人恐未深諳

上曰自古用將何分南北惟在得人且靖寇本以衛民攘外必先寧內爲將之道亦惟在得民心也

七月乙未



上諭陝西總督哈占四川巡撫杭愛曰據哈占奏稱秦餉由畧陽運至保寧令四川接運杭愛又言四川官少船缺不能接運杭愛旣以不能接運爲言仍著哈占及巡撫鄂愷甘肅巡撫巴錫等卽以畧陽糧艘運官運至敘州四川督撫速趲空船使回方今大兵進剿雲貴需餉至急旣已尅期進取輓運無過今秋川陝督撫自宜殫心籌畫勿悞軍需乃妄分彼此互相推諉遲延至今殊負職任嗣後當



同心商酌不拘疆界速爲饋運無悞進取如  
仍推諉遲延有失軍機經管其事自督撫以  
下各官俱以軍法從事

康熙二十一年壬戌正月己巳

上諭理藩院尙書阿穆瑚瑯等曰近見內外蒙  
古接壤處所互相攘奪盜竊者甚多遇此種  
事遣爾衙門官員前往察閱不思調和兩界  
裨益地方據實奏聞以副朕驅使但苟且竣  
局希圖脫免凡事有問諉云不知今朕俱已



洞悉爾等堂司官何曾啓奏一事尙可謂克盡職掌者乎嗣後務期勤慎宣力不得仍前草率疎忽

二月壬辰

上諭直隸巡撫格爾古德曰凡爲官者承貪吏之後名譽甚易承良吏之後名譽甚難金世德于成龍居官有聲爾繼其後得名必遲爾毋欲速以求名速則恐致擾民直隸旗下莊頭與民雜處朕聞所在凶惡莊頭自以旗下



倚恃其主甚爲民害爾洫任後加意嚴查務期懲創卽管皇莊者亦毋寬宥

九月己酉

上諭福建將軍佟國瑤曰國家設立督撫提鎮原以爲民向來駐防鎮江杭州福建等處漢軍官兵皆恣意妄行侵占市廛擅放私債多買人口如哈喇庫諾邁等一味營私罔遵法紀買人口至盈千百此等匪人用之何益昔孟喬芳總督陝西李率泰總督福建俱能潔



己奉公愛民恤士秦閩人至今思之爾到地方宜恪遵國憲安戢兵民毋負朕委任至意

十月乙亥

上遣郎中崑篤倫等採辦楠木

諭之曰爾等查採楠木所至地方當會同督撫實心詳察毋借端滋擾凡官解民房寺廟墳墓毋拆毀封採恐奸徒乘機詐害平民此意可曉諭地方令其悉知



大清聖祖合天弘運文武睿哲恭儉寬裕孝敬  
誠信中和功德大成仁皇帝聖訓卷之四十三



聖訓

卷四十三

三



大清聖祖合天弘運文武睿哲恭儉寬裕孝敬  
誠信中和功德大成仁皇帝聖訓卷之四十四

飭臣工二

康熙二十二年癸亥二月壬午

上諭直隸各省朝覲各官曰爾等各有職掌關  
係國計民生宜實心辦理如奏銷錢糧採買  
米石借端浮冒希圖侵剋審理刑獄顛倒是  
非稽延歲月致累平民皆因爾等因循怠玩  
積弊未除嗣後俱宜潔已奉公殫心盡職諸



凡公務俱照在內各官衙門事例勤慎辦理  
副朕察吏安民之意若謂道途遙遠所行弊  
端未必盡知仍沿陋習漫無省改憲典具存  
決不姑貸

癸未

上諭大學士等曰閱朝覲布按各官條奏於治  
民弭盜非不鋪張累牘然如何綏緝則盜源  
可靖如何儲備則凶歲無饑未見確切敷陳  
裨於實用惟麻爾圖所稱陝西積欠錢糧應



分四年帶徵其言頗當朕軫念陝西地方連  
年寇警輓運艱苦每欲蠲除宿負以兵革未  
息時方需餉未及豁免龔佳育言江邊蘆田  
坍塌無常應五年一丈量其在內田地原無  
增減請免丈量等語亦屬可行餘皆諸司瑣  
事若概令議覆徒煩章奏爾等傳集九卿詹  
事科道將各朝覲官奏疏同閱會議如有益  
於國計民生者始下所司確議否則擬旨報  
聞足矣且九卿詹事科道旣全見伊等所奏



本章則將來會推亦易知其賢否至所頒諭旨原爲察吏安民若伊等各自收藏無益其令刊刻頒發府州縣衛所使兵民一體通知不肖官員雖欲敗檢虐民亦知所忌憚不敢恣意以逞矣

三月甲子

上諭刑部國家設立問刑衙門期於明罰敕法弼教化民必審鞠精詳讞決平允而後民情悅服冤抑畢伸近見爾部審理大小事件每



多草率因循瞻徇舛錯如聽訟之時兩造是非自應分別定案因意有偏私往往不問曲直含糊完結以致奸頑幸免良善含冤又如奉差籍沒官員不能廉潔自持據實冊報乃恣意侵盜竟飽私橐殊非人臣奉公守法之誼至於審事官員膠執已見聽訟不公或更改口詞圖遂私意或恐嚇犯証不令直供或妄肆株連稽遲日月或怠玩疎忽苟且告竣弊端種種難以枚舉嗣後堂司各官俱著洗



心滌慮痛改前非一切刑名事務必令情法  
允協無枉無縱恪遵法紀持廉秉公以副朕  
委任之意又

諭曰爾刑部弊端朕無不悉知自後永行改革  
則已倘仍因循如故將爾等弊端摘發一事  
勿望倖免亦毋望止於罷斥已也爾等又每  
云身爲堂官筆帖式胥吏所作弊端焉能悉  
知今堂官亦有由筆帖式出身者斷難以不  
知情弊爲辭朕時加諮訪諸事莫逃洞鑒而



爾等諉爲不知可乎用復申飭務將夙弊盡行除革毋忽

閏六月癸亥

上諭大學士等曰一切政事皆國計民生所關最爲重大必處置極當乃獲實效朕每詳覽奏章內有所疑或折五六本七八本諮詢爾等者務欲得至當耳今爾等不各以所見直陳一切附會迎合朕意則於事何益朕從來不憚改過惟善是從卽如乾清門聽政時雖



朕意已定之事但視何人之言爲是朕卽擇而行之此爾等所共知也堅執已見獨持議論之人朕素所不悅觀今之大臣甚不如昔之大臣今之政事亦不如昔日部院無事無弊大臣無人無私外閒之弊較內更多朕知之久矣欲嚴治之則其人甚多難於盡處所以朕數年來屢下嚴旨加意剔釐今雖較前差善而弊尙未除且部院堂官止圖已身安逸辦事不勤堂官推諉司官司官推諉筆帖



式早歸私家詭稱終日在署此何理也

十一月戊辰朔

上諭湖廣總督董衛國曰爾在外任二十餘年  
地方事宜民生利病知之已悉何待朕言第  
總督爲一省大吏惟以奉公秉法潔已愛民  
爲要從前用兵之際未免騷擾閭閻今天下  
承平休養民力乃治道第一義何利當興何  
弊當革俱宜從實詳酌舉行惟時當承平而  
常若民生未遂民困未蘇則地方自然受福



若謂地方已經寧謐不時加體恤則所失多矣至一切事務本可速結者自應速結每見在外官員故意遲延致滋民累爾宜申飭所屬各官實心任事又在外官員行事京師無不悉知爾從前在任所行朕皆洞曉爾在軍中克有勞績朕卽下旨褒獎嗣後務益加砥礪爾爲部院已久在京部院大臣何須結納爾行事無疵何畏人言若行事失當雖結納大臣亦復何益耶



康熙二十三年甲子正月丙戌

上諭陝西按察使布喀曰按察使職司通省刑  
名必事到隨結不使遲悞方於事有益凡弊  
之生及百姓牽累皆由遲延不速結之故爾  
當潔己勤政將遲延牽累積弊詳加糾察勿  
致煩苦良民以爲屬員表率

二月己亥

上諭翰林院掌院學士牛鈕孫在豐曰翰林院  
乃儲養人才之地教習庶常當以品行文章



爲事一切交際禮文皆宜杜絕近聞有餽送  
重禮者庶常等俱甚寒苦自翰墨外不應別  
有所取前拉薩禮在時待伊等甚善所以至  
今有感念者至庫勒納任學士以來交際之  
風漸盛爾等宜加洗剔無負簡任之意

三月丁丑

上諭大學士等曰昨正陽門外被火朕數遣人  
往視該城及司坊巡捕營等官竝無一人在  
者亦無一救火之人因遣內大臣侍衛往救



火勢方熾未能旋熄朕親往登城指揮方得撲滅該城及司坊巡捕等官於該管地方職分所在平日不加謹隄防遇災又不急救殊爲怠忽左都御史科爾坤兵部侍郎郭丕阿蘭泰奏請朕還宮伊等留視及朕還宮後使人視之伊等亦已散去城外之地多係漢官居住遇此等亦應協力料理乃置若罔聞袖手不顧則他事亦因循坐視可知伊等皆國家大臣凡事當視若一體乃於身外之事畧



不關心可乎爾等可將此旨傳諭吏兵二部及都察院知之

四月庚子

上諭大學士等曰凡爲臣子必實心任事興利除弊不可苟且塞責俾衙門事一切整頓無有廢弛斯不負職業若循分碌碌因人成事雖小有勤勞殊無足取

五月癸未

上諭臺灣總兵官楊文魁曰臺灣遠在海隅新



經底定將弁立功者頗多尙未簡用因爾係舊人故特簡爲總兵官彼處新附兵丁以及土人黑人種類不一向來未沾教化不知禮義爾莅任後務期撫輯有方宜用威者懾之以威宜用恩者懷之以恩總在軍民兩便使海外宴安以稱朕意至於海洋爲利藪海舶商販必多爾須嚴飭不得因以爲利致生事端有負委託

八月庚戌



上諭督捕侍郎達哈塔曰朕以爾素有操守簡用侍郎近見爾衙門事務弊端尙多旗下人不無怨言若但守己廉潔而於凡事不能勉力肅清究竟何益嗣後爾當嚴率屬員事務悉加釐剔以副委任之意

九月己丑

上諭山東巡撫張鵬曰今見山東人民逃亡京畿近地及邊外各處爲非者甚多皆由地方勢豪侵佔良民田產無所倚藉乃至如此爾



莅任後務剪除勢豪招集流亡俾得其所

十一月壬戌朔

上巡幸江南駐蹕句容縣

諭知縣陳協濬曰知縣係親民之官與一縣民生休戚相關朕巡行之次見此處百姓困苦爾當潔已奉公愛民如子否則國法具在爾其慎之

康熙二十四年乙丑二月癸卯

上諭漕運總督徐旭齡曰源清則流潔爾爲大



吏潔已率屬官吏自不爲奸朕因前任諸臣均不稱職聞爾向任山東居官清慎著有賢聲故特簡茲任爾當益勵勤恪安輯軍民以副朕委任至意至於河漕事務原屬一體凡河工有關漕務者爾便宜行事不必推諉其屬官賢否宜從容廉訪果有真知確見方可入告凡舉一人務使千萬人知勸劾一人務使千萬人知懲至於待屬員不可過刻下吏亦各有艱難之處惟心平氣和則皆悅服矣



五月庚申朔

上諭新選庶吉士張希良等曰士子讀書稽古  
原期窮理致用平居砥礪廉隅敦修品行皆  
爲異日服官蒞政之本迨一登仕路志在功  
名未免奮意求進干營奔競喪其懷來往往  
有之爾多士從田閒來甫通仕籍務宜率其  
素履不改初心凡授內外職任其各加黽勉  
清操自矢恬靜寡營循分盡職潔已愛民以  
副朕造就人才至意



八月己亥

上諭九卿等曰官以清廉爲本如原任侍郎溫代察庫不可謂無才但以貪污故凡所行皆不足取此皆由不知廉恥耳又

諭曰部院堂官惟勤慎者能循分不致生事其專擅好勝之徒特欲假公事以遂其私意耳雖有才能於國家何裨

九月己卯

上諭大學士勒德洪等曰九卿詹事科道令其



會議會推本期至正至公務得真實今聞九卿會議之事閒或不據實具議草率苟且因循而行有此一次立議爭勝以冀下次不與相拂而從之者或有此一次將彼意中之人薦出冀下次將其親朋薦出以相報者或有薦其門生者有薦其同年者有薦其同鄉親友者夫九卿會議會推理宜虛公持論豈可一二人擅專以行且設立科道本欲其凡事從實建言有執拘護庇者卽爲指叅也其擅



專執拘護庇之人何未見糾劾耶衆議之時亦有一同具議後因其事不當復云彼時我原如此說者如果原議時衆論與伊意不合卽宜將已見明白敷陳另立一議旣不另立一議同列職名又稱我曾如此說是斷斷不可者朕於康熙十八年亦因此等事曾經有旨申飭可查前旨一并復行傳諭凡事會議不必詢問本省大臣官員若每加詢問或致不肖之人益在地方生事橫行本省督撫地



方官無不畏懼且將凡屬會議之事無不囑託本省大臣官員矣政務何由得平今會議山西巡撫穆爾賽因係滿洲恐致敗露意欲從平易歸結耳若是何不於事前豫爲勸戒令其公廉乃不爲豫戒徒於事發之後欲如此結案可乎爾等齊集滿漢九卿大臣傳諭甲飭之

十月庚戌

上諭大學士等曰近見工部凡於交送物件皆



耽延時日抑勒不收弊端滋多此後其嚴禁之可傳諭工部

康熙二十五年丙寅正月甲戌雲南貴州總督蔡毓榮題逆苗王騰龍等聚眾劫掠應行征剿

上諭大學士等曰苗蠻賦性樸實不敢生事祇以地方該管官不克平情撫恤反需索馬匹金銀誅求無已不能供應遂生釁端耳前逆賊吳三桂亦因需索水西不遂貪欲捏奏水



西反叛竟自發兵剿滅盡取其利以爲己有  
今苗蠻之事恐亦類此敕該部知之

二月癸巳

上諭直隸各省朝覲官員等曰國家三載考績  
原以崇獎廉善擯斥貪殘必吏治澄清庶民  
生安樂今當大計已嚴飭所司重懲貪酷餘  
俱如例降革其有衆論不孚是非失實者特  
黜一二以警積玩外姑准爾等仍服原官爾  
等平日官評賢否公論昭然若值會推輒鑽



營奔競以圖僥倖居心先已不肖何以率屬  
蒞民且凡朝覲之期每因仍陋習借端科派  
大小相循私通交際是察吏本以安民而反  
以擾民甚非朕激揚清濁至意嗣後務須洗  
滌肺腸勉圖自新毋貌承心違蹈常襲故國  
憲具存決不爾貸

戊申

上諭吏部兵部我國家掃除逆孽平定遐荒卽  
負山阻籌之苗民咸輸誠供賦封疆大吏自



宜宣布德意動其畏懷俾習俗漸馴無相侵  
害庶治化孚於遠邇近見雲南貴州廣西四  
川湖廣等處督撫提鎮各官不惟不善撫綏  
更恣苛虐利其土產珍奇貨藏饒裕輒圖入  
已悉索未遂因之起釁職爲厲階蠢爾有苗  
激成抗拒卽擅殺一二謊稱累百盈千始黷  
貨以生端旣邀功以逞志藐玩因循殊負委  
任朕思土司苗蠻授官輸賦悉歸王化有何  
杌隉互相格鬪無有寧居嗣後作何立法務



令該地方督撫提鎮等官洗心易慮痛改前轍推示誠信化導安輯各循土俗樂業遂生亦令苗民恪遵約束不致侵擾內地居民以副朕撫馭遐方至意

三月乙卯朔

上諭直隸巡撫于成龍曰直隸旗下各莊人戶不守法度爾須執法嚴治不得瞻徇顧忌朕留心民瘼外事無不周知卽如工部所用車輛係發價現僱今俱派取州縣如此積弊不



止一端爾到任逐一查明奏聞爾固宜正已  
率屬廉潔愛民亦宜寬以濟猛勿過刻也且  
居官不善縱或漏網亦將禍及子孫爾須有  
始有終實心任事從國計民生起見盡力爲  
之

閏四月乙亥吏部等衙門遵

旨會推廣西按察使員缺吏部侍郎胡簡敬保  
舉江南淮揚道高成美擬正湖廣下荆  
南道沈志禮擬陪具奏



上諭曰凡職任緊要官員奉旨會推原期從公保舉務得真才有裨官守且官評賢否關係吏治民生若以本地方人推舉本省官員必致瞻徇滋弊前已經屢諭申飭甚明今胡簡敬以淮安府人推舉淮揚道高成美殊屬不合著嚴加議處九卿等不加詳慎草率擬推亦屬不合著通行申飭

康熙二十六年丁卯三月辛丑

上諭大學士等曰近來不雨政事恐有未當令



九卿議奏越二日癸卯大學士等覆奏國家  
政事實無可更改釐定者  
上曰堯舜之世方可稱無闕失然猶兢兢業業  
不敢謂已治已安漢文帝亦古之賢主賈誼  
猶指陳得失直言切諫今但云主聖臣賢政  
事無闕豈國家果無一事可言耶况求言原  
屬要事無論智愚皆當各陳已見以備採擇  
始於政務有所裨益大小臣工各宜盡心職  
業視國事如家事方副委任之意今每部滿



漢堂官各有六員其閒任事者但一二人餘則隨衆署名而已卽如各部啓奏本章每日不過數件其中情節如漢侍郎等未必了徹設朕問之諒有不能對者漢官公事之餘或持齋誦經滿官公事之餘或崇尙僧道不以國事爲念朕觀今世之人專務逢迎諂媚鮮有直道而行者且已不勤而每誚人爲惰已無能而每嗤人爲劣此不過徒工浮議耳何益之有



七月辛卯刑部題浙江民張遴叩闕請  
發與該撫審理

上諭大學士等曰此案若交與該撫審理豈肯  
將實情明白審出著刑部擇選賢能司官往  
審近見河南審事司官竟不明晰此皆瞻徇  
各部院堂官不敢結怨耳大凡督撫無不與  
部院堂官營求結納分樹門戶若司官與督  
撫相悖卽結怨於堂官尙能保其職乎部院  
堂官各援引親戚朋黨營求凡員缺未出之



先其人預定及會推時惟贊揚援引而從公  
推擬者甚少又有爲司官筆帖式時所行貪  
婪至於大位僞稱清廉者若此居心深可鄙  
恥今部院官員亦稍知更改若循此而行固  
善倘仍蹈前轍貪汙不悛是自棄其身也雖  
或傲倖苟免於刑鬼神豈肯宥耶

己亥

上遣刑部郎中阿西潭等往浙江察審張遴一

案



諭之曰向來奉差官員往往騷擾驛遞貽累小民朕深悉之故數年以來槩不差遣昨見張遴所告似有冤抑因遣爾等往理務須詳審公平慎毋顛倒是非奸民叩閭亦有巧爲飾說者地方官員亦有善於夤緣者爾等不可偏私拘執專徇一面之詞必得兩造實情若是非不明輿論不服則大負朕懷矣

康熙二十七年戊辰正月丁酉

上諭江西巡撫王鶚廣東巡撫朱弘祚曰巡撫



爲地方大吏以操守爲要大法則小廉百姓俱蒙福矣身爲大臣尋常日用豈能一無所費若必分毫取給於家勢亦有所不能但操守廉潔念念從愛百姓起見便爲良吏爲督撫者在朕前皆能言之及至地方與所言往往不符人貴始終如一朕特簡爾等當砥礪清操毋負朕擢用之意朕事事以百姓爲念爾等到地方一切利弊有關百姓者不妨事奏聞爲大吏者亦須安靜安靜則爲地方



之福凡貪污屬吏先當訓誡之若始終不悛再行叅劾可也

二月壬子

上諭大學士等曰國家設官分職必須大法小廉實心任事庶不負朕拔擢簡用之意朕親政已久於大小官員行事無不深悉爲臣子者旣荷爵祿顯榮便當知足無致隕越前已屢頒諭旨又再三面加訓誨今在廷諸臣自大學士以下全不敬勤供職但知偷安自便



互相交結貪賄營私種種情狀不堪枚舉九卿詹事科道皆朕委任之員凡遇會議理宜各出己見公同商酌乃一二人倡率持議於前衆遂附和於後又其甚者雖在會議之班茫無知識隨衆畫題更有於集議時緘默自容及至僨事巧行推卸此等情狀朕所痛惡至於用人關係重大恐賢否難以周知故遇緊要員缺特令會推原期爲國得人亦欲令被舉之人警心易慮惟恐溺職累及舉者因



而自加勉勵乃歷來所舉官員如張汧章欽  
文之流貪黷敗類往往發覺此皆瞻徇情面  
植黨納賄所致前者班布爾善阿思哈等身  
爲大臣所行悖亂致干重辟然朕尙耿於懷  
是以比來大小官員徇私納賄朕雖洞見而  
不卽指發冀其省改庶可終始保全豈意積  
習深錮漫無悛悔如審擬蔡毓榮一案瞻徇  
黨類百計營救因朕具悉其奸私謀莫遂近  
差色冷額往審張汧被叅情由朕曾諄諄面



諭及色冷額回時奏稱此案若有失實甘治死罪朕覽其奏案則又庇護保舉張汧之人內閣擬票亦未議及又靳輔下河工程屯田之案朕早已察其情弊及遣佛倫等前往勘議甚屬偏私且凡會議之時科爾坤佛倫等務執已見苟非懷挾私情何以力排衆議屢經誠諭未見畏悔物議沸騰輿情憤激以致言官列款叅奏雖言官亦非先期舉發直待朕諭飭之後方行論糾然爾等果能持公爭



論何至敗事且爾等行私朕皆洞曉因不忍  
加刑於大臣又用兵之時有著勞績者故免  
其彰顯厥罪嗣後大小臣工各宜痛改陋習  
勉盡職掌以副朕寬大矜全之意

五月壬申朔

上諭大學士等曰凡會議政事必詳察合理不  
可怠忽輕易朕每遇事之大者卽與內閣大  
臣商酌而後定凡授大僚無不如此至吏部  
陞補官員俱有一定之例或有不肖之徒賄



求不已此皆習俗不良今當痛改前轍凡事俱各抒已見一意秉公不可碌碌徇人且徇人何益孰優孰劣朕豈有不知者乎

康熙二十八年己巳三月丙申

上諭大學士等曰凡地方文武官員務須各盡職掌實心任事黽勉効力方爲稱職今見直隸各省文武各官多有虛糜廩祿怠玩因循事務廢弛行伍虛冒船隻任其朽壞器械全不整理且有無多寡茫然不知總因任內職



業視爲具文漫不經心殊屬不合著各該督撫提鎮通行所屬官員嚴加申飭令其痛改積習力圖振刷恪勤守職如仍前玩忽定行從重治罪

康熙二十九年庚午正月己酉

上諭九卿等曰朕自臨御以來夙夜兢兢勤求治理念切民依冀登安阜去歲畿輔旱荒雖經蠲租發帑賑濟窮黎朕猶軫念未已卿等各宜恪體朕衷持廉秉公實心盡職毋得營



私結黨師生親友互相徇庇聽受囑託遇事推諉自圖便安務期於國計民生實有裨益

康熙三十年辛未十一月己未

上諭吏部從來致治之道在正人心人心偏私則詐僞日生而習俗滋弊人心公直則囂競自息而庶績允釐朕早夜孜孜崇尚德教蠲滌煩苛期與中外臣民共適於寬大和平之治凡大小諸臣素經拔擢咸思恩禮下逮曲全始終卽或因事放歸或罹咎罷斥仍令各



安田里樂業遂生惟爾諸臣亦宜奉職恪共  
絕偏私而襄國事近見內外各官閒有彼此  
傾軋伐異黨同私怨交尋牽連報復或已所  
銜恨而反囑人糾叅陰爲主使或意所欲言  
而不直指其事巧陷術中雖業已解職投閒  
仍復吹求不止株連逮於子弟顛覆及於身  
家甚且市井奸民亦得借端凌侮蔑紀傷化  
不可勝言凡若所行雖迹甚詭秘朕總攬機  
務已三十年此等情態知之甚悉倘因仍陋



習益致蔓延殊非朝廷所以體恤臣工保全  
愛惜之意夫讒譖媚嫉之害歷代皆有而明  
末爲甚公家之事置若罔聞而分樹黨援飛  
誣排陷迄無虛日以致釀禍旣久上延國家  
朕歷觀前史於此等背公悞國之人深切痛  
恨自今以往內外大小諸臣應仰體朕懷各  
端心術盡蠲私忿共矢公忠豈獨國事有裨  
卽爾諸臣亦獲身名俱泰倘仍執迷不悟復  
踵前非朕將窮極根株悉坐以交結朋黨之



罪爾部可卽傳示中外使咸知朕意

大清聖祖合天弘運文武睿哲恭儉寬裕孝敬  
誠信中和功德大成仁皇帝聖訓卷之四十四











